

Alieni igitur comedent opes eius. & ipse stolidus ad Deum non reuertitur. Vidensq; senes suos effundi, ac perire, non curat ad Dominum confugere. vel aliter. videns se canescere, non aduertit se peccati pœnas subire. ¶ Igitur scelus est, peccatorem, vel in senio non suam agnoscere culpam. Maledictus *Isai. 65.* verò puer centum annorum. & scelus maximum erat, quod senes adorarent picturas parietum. *Ezech. 8.*

*Et humiliabitur superbia Israelis in facie eius. nec reuersi sunt ad Dominum Deum suum: & non quaesierunt eum in omnibus his.* Scribitur *4. Reg. 10.* li. 4. Reg. quod cœpit Dominus tædere super Israel, & percussit eum Hazael, in omnibus finibus Israel. En humiliatam Israelis superbiam. Ac si alapa in facie percussus fuisset. Nec tamen in his castigationibus Deum quaesivit. ¶ Ergo castigationum finis, nō est castigatio ipsa. Non enim Deus vult mortem peccatoris: sed magis, vt conuertatur & viuat. *Ezech. 18.*

*Et factus est Ephraim, quasi columba seducta non habens cor. Aegyptum inuocabant, ad Assyrios abierunt. Et cum profecti fuerint, expandam super eos rete meum: & quasi volucres cœli detraham eos. Cedam eos, secundum auditionem cœtus eorum.* Nulla ferè auis est, *Vide Aeli. anam.* quæ tam sagaciter norit aues inimicas, vt columba: nec quæ cautius eas fugere soleat. Id verò ea columba facit, quæ cor habet, at Ephraim est quidem ex Diuina voluntate columba: ex malitia verò est seducta, & corde